

Alatxia

Paulo Tyyriti, Alatxia Mahãdu-ò

1 ¹Jiarỹ Paulo, rybeõmy nodu rare. Inyõ riwateõnyõhyyre. Jesuisi Kristule, Deuxu inytyby, Kristu ixixadỹydu-wana riwateõnyre. ²Jiarỹ ityhydỹydu seriðre-wana. Kaa watyyritireny rewahinyreri Alatxia bedeludu mahãdu-ò, ibutummy dohodỹyña mahãdu-ò, ityhydỹydu mahãdu-ò wahe. ³Ruxetøena ywina-wana adeeremy kanakemy idi watzireri Jesuisi Kristu-ribi, Deuxu inytybyreny-ribi. ⁴Jesuisi rexiwahinyre iny òrarureny-ribi iny ritarenykemy. Wiji bede aõmydỹyñabina-ribi iny ritarenykemy. Kia dori Deuxu-ò inytybydeewimy rare. ⁵Tamy àlãna aõu aõu kanawahimyhỹke. ⁶⁻⁷Jiarỹ bede reðiinyra, rybe witziraõ eleelemy tetyhynmahãteki. Rybewihikỹ witzira ihoõre. Juhuu Kristu taruxetøena-di bedebina-ribi aratareny. Inyõ adee rare. Idi Deuxu Rybewihikỹ riwitziranykemy. Tai tahe atyhydỹyña ribinadỹyñra. Tai tahe kiamy adee rarybera. ⁸Inyõ aõbo, jiarỹ aõbo, ada biuludu ýju aõbo, adee Rybewihikỹ witziraõ rarybekeki, Deuxu kyarana tamy kedesekeki idi watzireri. Rybewihikỹ-ò juhu waribi taholatenyte. Kia sohojile inatyhyre. ⁹Iwese rarybere wese ixityre ararybekre. Inyõ Rybewihikỹ riwitziranykeki, aõmybo juhuu taholateny-ribi, Deuxu kyanamy resekre. ¹⁰Deuxudeewimy taheka watzireri hãbudeewimy aõkõ. Jiarỹ hãbudeewimy araximyhỹkeki Kristu deõdu aõkõ jiarỹ rare. ¹¹Aõmybo rarybemyhỹre hãbu-ribi rare. Kia Rybewihikỹ tyhy rare. Kia bierybenyke. ¹²Kia tihãbuõ-ribi adoholaõhyymahãde. Hãburybe-ki aõkõ reeryre Jesuisi Kristule dori kia riwaerynanyre. ¹³Kaiboho taholatenyte, iwese jiarỹ judeu mahãduy-ki raremahãu lu Deuxu ityhydỹydu mahãdu aõbinamy rewinydỹyñanymyhỹre. Idi ariixãwididỹyñkemy rarewãhã. ¹⁴Wamahãduy-ki sõwemy iratyre raremahã judeu mahãdu bede ywina ywidỹy-ki. Idi retyhynyhyymahãre wahona mahãdu ratyre, byrena erỹdỹyña-ki. ¹⁵Iribi tahe Deuxu riwamyre taruxetøena-kí. Ratohouãnyõlemy rareõ juhu riwahitxinyre. ¹⁶Wadee Deuxu tariðre riteðsinykremy ratximyhỹ judeukõdu mahãdu-ò tuu ararybekemy wadi ratximyhỹ. lu inyõ dee aõmy rarybeõhyyre Jerusalẽ hãwã-ò raõhyyre. ¹⁷Rõtýhydỹyõmy raremahãu.

Deuxu deòdÿÿna mahādule rÿiramyhÿ. Ihārele tahe tamy rybemy raōra. Iribi tahe rahōnyra Arabia-ò. Idi tahe ixityrele addòsede Damasu-ò.

¹⁸Inataō beòramy heka kowa-ki rejere. Idi tahe rare Jerusalē-ò Pedro roramy. Tahe bede rejere waiyre txumy tai. ¹⁹Ijōmy heka rabiōhyyre deòdÿÿna mahāduōmy. Txiaulemy heka rabire, Kristu seriðremy. ²⁰Ka heka watyriti inatyhy rare. Deuxuko-txi inatyhy rare. ²¹Idi Siria bede-ò rare, tule Silisia bede-ò. ²²Judeia bede-ki Kristu dohodÿÿdu mahādu wamy lobixidu aōkō rÿira. ²³Uritÿÿna roholamyhÿre:

—Kia juhu inyhudurenymy inydireny raremyhÿ, wiji tahe tyhyna-di dobedeerydÿÿnanyhÿde. Juhu tahe tii tyhyna rahukemy riwisÿnyre. ²⁴Kia ibutu òraru-ki tahe Deuxu-ò deàlāmyhÿde wamy, Paulo wahe.

2 ¹Waðinaubiðwa reurò beòra-di rexihureu, ixiby Jerusalē-ò ròsere. Banabe, Txitu-wana redyre. ²Rawāhare heka rasi wese-ki aōmybo rabireki. Retÿÿnyre iny-ò iwese inywitxira-ò rarybemyhÿremy. Dohodÿÿdu mahādu ratyre retare tamy rihitxinyre rarybekemy. Tuu arierykemy watxireri ywimy watxiwāharemy. ³Txitu wawana ihÿre, tii judeukōdu mahāduō hārele tahe itōtyky resymy rarybeōhyreny. Tiiboho waki ibinamy rahaōhyreny. ⁴Idile rōhōtinymy hÿre ityhydÿÿdukōdu mahādu. Tiiboho nalòdenyde waixāwididÿÿnaren-ò retehekremy, iny Kristu-ki ijōdiwāhare-ò. Tiiboho ixiwesemy iny-di risÿnykemy ratxirenyreri. Tiiboho ityhydÿÿdu wesemy rexisÿnymy hÿre. ⁵Tamy jiarÿboho raholarenyōhyymahāre inatyhymy Rybewihikÿ aribireny ritaōhykemy. ⁶⁻⁹Dohodÿÿdu mahādu ratyre mahādu heka Joaō, Txiau, Pedro-wana rare. Tiiboho ibutu ersyna ratyre rÿiraki, kia aō aōkō wadee rare. Tiiboho aō tÿmyra riwabeðeerynyōre. Deuxu-ò tahe ibutumy iny wiwesehy rare. Deuxu riwateōnyreny judeukōdu mahādu-ò Rybewihikÿ wahisidÿÿmy. Kia Joaōboho wiwesehylyemy widi rōhōtinyre riwawehitynanyra jiarÿ Banabe-wana. Tai tahe iwese Pedro judeukōdu mahādu-ò rare. Tiiboho tahe ritÿÿnynymy hÿke judeu mahāduòle wahe. ¹⁰Urile riwatyhenyry iny aōkōdu mahādu ariwiòhenanymahākemy. Kia juhū ariwinykemy watxiwāhare.

¹¹⁻¹²Atxiòkia-ò Pedro rehemyhÿreu jiarÿ tuu rarybere timybo ibinamy riwinymy ihÿremy rexiitxenanyhÿreki. Hābuō Txiau-ribi rehemynyōrau, tii judeukōdu mahādu-wana riroxire. Irahudi tahe dehemyndenydeu, riroxiōhylyemy rexitare. Judeu mahādu rybe lau ruberure. ¹³Ijō judeu iwesele rotÿÿnyre. Ihewoludu Banabe tulere. ¹⁴Tuu rabireu, òbitimy aōkō Rybewihikÿ inatyhy wesemy aōkō rotÿÿnynmy raremyhÿ tahe rarybere ibuturu-ò, Pedro-ò. Kai judeu mabekeki, tahe judeukōdu mahādu wesemy tanabededÿÿnanamy ahāte. Uritere judeukō mahādu judeu mahādu wesemy isÿdÿÿōmy. ¹⁵Jiarÿboho tahe judeu mahādumy reamahāreny. Judeukō mahādumy aōkō watxiwāharenyre. ¹⁶Iny bede ywidÿÿna aōkō iny ritamy roire. Kia Kristu iny rityhynymy hÿrele iny ritamy roire. Bede ywina ywityhydÿÿna iny ritaōtyhy. ¹⁷Iny Kristu-ki tarasana ritamy ratxikeki, tahe òrarudu tyhymy ronykeki, Kristu aōbo òraruna widÿÿna rare? Aōkōre. ¹⁸Jiarÿ bede ywiny ywidÿÿna-ò aròðsekeki, òrarudumy ararekre.

Kia jiarĩ idi ariatymy rĩĩmyhĩre ixityre ariwinykeki òrarudumy arareke. ¹⁹Jiarĩ bede ywina rarumy rãire wese, Kristu-ò warumy ararekremy. Kristu-wana jiarĩ raitxeòkirubudỹĩnanamahãre. ²⁰Jiarĩ ixidee warumy aõkõ wahãre. Kristu tahe wawo-ki riwarudỹĩnanymy ihĩre. Warumy watzixeriwana Deuxu iriòretyhydỹĩna òrarukile warumy wãhãre. Tii waluumy ratximyhĩre. Tahe wadee rexiwahinyra. ²¹Deuxu ruxetòedỹĩna aribynykemymy aõkõ watzixeriri. Bede ywina tyhydỹĩna òraru-ki ywityhydỹĩna tahe inyõ ritakemy ratxireri. Kia-di inatyhymy inyõ rexitakeki tahe, Kristu uriòle rurure.

3 ¹Alatxia mahãdu timybo tahõtinyteri kaiboho òhõtibede-di rierykõrenyre. Kia-di òsana tahõtinyre. Moòwòru ijeranamymy ahãtenynte. Jesuisi Kristu itxeò-ki rururedi taholatentytyhyta. Òhõtì-ribi aõbo kia rosare. ²Kiale arierykemymy watzixeriri timybo tahõtinytenyteri: Deuxu Tyytybytyhy temytenyta bede ywina widỹĩnamy aõbo ada inatyhyna tyhydỹĩnamy aõbo. ³Juhu urile tetyhynytenyteri idi ixiumykile tadexityhynymy ahãtenynte, bede ywina ywisidỹĩna wahe. ⁴Kaiboho òbitimymy tahõtinyòtenynte. Kia aõbo aõhòkỹmy tatỹĩnytenynte uriòhyòle? ⁵⁻⁶Aõkõre, uriòkele aõkõre òsana tahõtinyteri. Deuxu Tatytybytyhy adeereny diwahinyde. Kia aõbo riwinyre bede ywina ywisidỹĩna kaiboho tamahãtenyteki? Aõkõre, tetyhynmahãteki kia riwinyre. Deuxu aõna aõna wiwihikỹ akoreny-ki riwinyre. Kia sohojile iny ritake. Abraõ Deuxu rityhinyre. Tai tahe tamy òbitimymy rare Deuxu-ò, iòraru iribi riixãwididỹĩnyraki. ⁷Tai ibutumymy rityhynymyhĩre mahãdu Abraõ riòremy rĩra. ⁸Tyyriti-ki roimyhĩre kia: —Deuxu heka judeu mahãdu sohojile aõkõ riòbitinykre. Ibutumymy iny riòbitinykre ityhydỹĩ ersydỹĩna òraru-ki. Rybewihikỹ ersyna Abraõ-ò juhuu dehemynde. Kia wese Tyyriti doide: —Aòraru-ki ibutumymy iny-ò deysana kanakre. ⁹Tahe ityhydỹĩdu mahãdu Abraõ wesemy teysare. Abraõ dori ityhydỹĩdu rare. ¹⁰Inyõ bede ywina rityhynyòkeki, Deuxu txuhòbina kedeake. Jesuisi-ò tyhynale iny kiditakre. Kia Tyyritidỹĩna dori roire: —Inyõ ibutumymy bede ywina riywinyòkeki, tamy Deuxu txuhòbina kedealeke. ¹¹Òbiti mahãdu rityhynymy ronykre. Kia riki Rìtidỹĩna roire. Tahe bede ywina heka inyboho aõkõ riòbitidỹĩnyre. ¹²Bede ywina heka iwitxi rare ityhyna-ribi. Tahe inyõ bede ywina rityhynymy ratxikeki, tii ibutumymy rityhynymy rarehyyke. ¹³Inyboho Deuxu bede ywina rikiwinyrenyòkeki, Deuxu txuhòbina inydeereny kedeakre. Kristu tahe kia-ribi iny ritare. Tule inyòwòruna òraru-ki rexilamadỹĩnyre inydee iòwydỹĩna-ki. Beteheke Tyyritidỹĩna roire: —Inyõ òwòru itxeò-ki ritamadỹĩnykeki, tamy txuhòbina kedealekre. ¹⁴Deuxu narybede heka Tatytybytyhy iny-ò riwahinykemymy. Wiji tahe inyõ rityhynykeki, Deuxu Tyytybytyhy ritakre. Tai Abraõ deysana inydeereny rehemynyre Jesuisi Kristu òraru-ki.

¹⁵Waseriòreboho, jiarĩ hàbu wesemy ararybekre. Iny inatxi jurasadỹĩna ritina riwinykeki, inireny ritidikeki, inyõ riwitxiranyòtyhy. Tai ijõ witxira riritinyòtyhy. ¹⁶Boholabenyke, Deuxu juhuu Abraõ dee narybede: —Abraõ riòre hewoluduò Kristumy. Abraõ riòre sòwe dee rarybeòre. Sohojideele rarybere. Tahe tariòre-ò Kristumy rarybere. ¹⁷Tuheka rarybereri: —Deuxu juradỹĩna wese juhuu

rarybere, 430 beòra bede rỹire idi tahe bede ywina nade. Kia Deuxu juradỹyna riixãwidinyòtyhy. ¹⁸Tarasany bede ywinawidỹyna òraru-ki kidiwahinykeki, wahisidỹyna aòkò heka rare. Tai Deuxu heka Abraõ-ò jurasadỹyna riwahinyre. Iòwydimy aòkò juhoo dori rarybere tii kidiwahinykemy. ¹⁹Aòherekibo heka nade? Kia nade òraru-na òraru-ki Kristu nadeule kỹny juhu ludu wese aòkò roire. Kristu heka Deuxu deòdỹyna rare. Iwese Deuxu rarybere wese riwahinyre. Tii Abraõ riòre riòre-ribihyy reare. Ýjummy bede ywina nade. Iny itya ludu debò-ki rehemyryra. Moisesi iwahidỹyðure. ²⁰Boholake, Moisesi sohojile aòkò itya ludu ratxireri bede ywina riwahinyreu. Deuxu tahe sohojile rare irybe riwahinyreu. ²¹Bede ywina aòbo Deuxu jurasadỹyna riixãwidinyke? Aòkòre. Bede ywina umy ituedeòna riwahinykeki, òbitidỹyna inatyhymy bede ywina nade. Tahe aòkòre. ²²Deuxu Tyyriti rarybere: ibutumy iny òraru-na-di ratxireri. Kristu iny rityhinykeki, Deuxu jurasadỹyna tamy riwahinyke.

²³Ityhydỹyna rehemyrymynykoki bede ywina iny rityhynymyhỹre ròtenawo-ki inyboho roire wese. Kia-ò iny riraòhymy rỹimyhỹre inatyhydỹyna kedehemyrykemy. ²⁴Uladu bedeerydỹyðu wese bede ywina rare inydeereny. Kristu rehemyrykòu, inyboho bede ywina rityhynyreny. Tai Kristu-ò inyboho òbitimy ronykremy ityhydỹyna òraru-ki. ²⁵Ityhydỹyna-ò iny rehemyryreu, uladu bede erydỹyðu-ribi ixãwimyhỹre. ²⁶Kristu-ki ibutumy Deuxu riòre atximahãtenyete ityhydỹyna-ki. ²⁷Ibutu dori Kristu-ò taratisebenyete, Kristu wesemy tatỹnyete. ²⁸Kristu tỹnydỹyna-ki wiribi hitximy aòkò boibe, judeukòðu mahãdu, iny-wana, deòdu deòdu aòkò-wana, ijoi hãwyy-wana ibutumy wiwese wesele Kristu-ki rỹilke. ²⁹Kristu-ki mabekeki, Abraõ riòre riòrelemy mabekre. Jurasadỹyna rareasadỹyðumy atximahãtenyete.

4 ¹Ijyyò arelyykre —rareasadỹyðuò deòdu wesemy raremyhỹ tii uladumy rareu, ibutu wedu rare hãre wahe. ²Urile tyby rarybere raumynykòule, tii tatibiedỹyðu rybe rityhynymyhỹre. ³Kia wese iny rare. Uladu wesemy bede aòmydỹynana rityhynymyhỹre juhoo. ⁴⁻⁵Iribi tahe bededỹynana he rehemyryra. Deuxu tahe Tariòre diteònyde ijadòma ririòredỹyrynkremy. Bede ywina tyhynakremy reare. Tii nade bede ywina tyhydỹyðu mahãdu tarasamy kia tyhyna-ribi ritakemy tariòre wesemy ritibienykeki. ⁶Deuxu Riòre wesemy iny ihỹreki iny-ki ratximyhỹreki, Tatytybytyhy inywo-ò risỹnyre. Tai inywo-ribi rarybemyhỹre: —Waha, Waha. ⁷Wiji tahe deòdu wese aòkò atxiteri, Deuxu riòretyhy wese atxiteri. Tule Deuxu rareasadỹyðuòle tate.

⁸Juhoo Deuxu teeryòtenyete. Kaiboho deuxu witxira wese tetyhynytenyete —deuxu inatyhy aòkò tetyhynytenyete. ⁹Ka tahe Deuxu teerymy ahãtenyete tetyhynmahãte. Deuxu anaerynymyhỹdenyete. Ixyby bede aòmydỹynana-ò òòsedỹyòmy, arawiòhenyòreki. Deòdumy aòkò ixyby rỹimy boibeke. ¹⁰Txu yrubudỹyòmy, ahãdu yrubudỹyòmy, beòra yrubudỹyòmy. ¹¹Inatyhymy ada aòkòre aòbo waaòmysỹdỹyna adeereny reònonyrya?

¹²Wawesehymy boibeke. Jiarỹ dori tatemahã wese raremahã, waseriòreboho. Kaiboho wadee aòbina tewinyòmahãtenyete. ¹³Kia teeryte. Jiarỹ juhoo adeereny

Deuxu rybemy rarybereu, jiarỹ iu wabinawãhãu. ¹⁴Wabinana heka isirare adeereny, ihãre tahe waderaõre tahe wadi arukirenyra, iwese ýju Deuxu-ribi jiarỹ anade wese kaiboho tiwamytenynte, iwese taheka Jesuisi Kristule jiarỹ rare wese wadi tewisỹnytenynte. ¹⁵Titxibo rare eysanareny juhuhu adi toite wahe. Kaiboho aruereny wii tesỹnomy toitemyhỹ kaiboho wakyyrenyrenki. ¹⁶Jiarỹ aõbohe aõludumy relera, inatyhy rybe adeereny rarybereki? Aõkõhyyre. ¹⁷Hãbuõ arãitxenanyhỹreny. Aluu wese heka ratxirerimy ihỹre. Aõlõnomy dori rarunyreri. Tiiboho wabiõwana-ribi atarasamy adi ihỹreny. ¹⁸Aõwihikỹ erysomy marurunyke. Tii tahe awire, awanale watxireriki aõkõ. ¹⁹Wariõre wese, adeereny aõhõkỹmy ratỹnyre, hãwyy reamyhỹre mytxitxi wese jiarỹ rare adeereny Kristu awo-ki rexilamadỹnyhyykemy. ²⁰Awanareny ararekemy watxireri. Tai tahe warybe wixira-di kia anarybekemy watxireri. Aõhebo adeereny heka arasỹnyre arawiohenanykemy watxiwãhãre. Timybo reerykõre dori.

²¹Inyõ bede ywina tyhydỹdumy ratxikeki, wadee manarybeke kiamy: aõmybo bede ywina raryberamy teeryteri? ²²Kia Tyyritidỹna-ki roire Abraõ riõre inatxire. Juhuhu ludu teõdu-ribi, Haari-ribi, reare tabireludu-ribi. Ijõ, Sara-ribi, ihãwyytyhy-ribi reara, deõdu-ribi aõkõ. ²³Deõdu riõre ibutu dee wese nade. Abraõ hãwyy riõre aõkõre Deuxu rybewahisidỹna xiery reare. ²⁴Kia ijyy-di rawesenanyreri. Inatxi hãwyy inatxi jurasadỹna wese heka rare. ²⁵Ijõ Haari inire, deõduni. Iriõre deõdumy rarekemy reare. Sinai Hãwãlõ wese tii rare. Kowa tyre-ki bede ywina inydee riwahinyre. Jerusalẽ wesemy roimyhỹre kia mahãdu deõdumy dori rỹira, tariõre-wana. ²⁶Jerusalẽ tyhydỹna mahãdu, biu ludu tahe deõdu wese aõkõ rare, ixinamy inyboho roire. Abraõ hãwyytyhy riõre wese inyboho roire. ²⁷Tyyritidỹnaõ dori roire: —Hãwyy ariõreõ beysakre. Birajuakre ariõrekõhãrele beysamy ariõredikire heka. Hãwyy risina riõre sõwetyhyre, hãwyy ihãbu-di ratyre. ²⁸Waseriõreboho, kaiboho rybe ywisidỹna riõre wesemy ahãtenynte, Ijai wesemy. ²⁹Iwese ibutu ludu wesemy reareõ aõbina riwidỹnananyhỹre. Deuxu Tyytybytyhymy reareõ. Wiji, tahe kia weselemyhỹre. ³⁰Tyyritidỹny rarybera: —Biteõnyke deõdu tariõre-wana. Rareasadỹdu ibutumy rimykre. Hãwyy deõdu aõ aõkõ rimykre tariõre-wana. ³¹Waseriõreboho, deõdu riõre wese aõkõ inyboho roire. Hãwyytyhy riõre tahe iny roire.

5 ¹Kristu inyboho ritare ixinamy inyweduoõduõlemy roirekemy. Kawese rokoirekemy. Deõdu wese ixiby rukunynyrenyõkre.

²Jiarỹ, Paulo, adeereny rarybereri: inyõ notykyresyna-õ ròðsekeki, Kristu riwiõhenanyõhyymyhỹre. ³Ixityre ararybeke. Inyõ rinotykyresynanykeki, bede ywina ibutumy tii riyrubunyhyyke. ⁴Inyõ bede ywina rexiõbitinymy ratxikeki, Kristu-ribi rexihitxidỹnyhỹre, ruxetõena tyhyna-ribi rexitare. ⁵Deuxu riwaõbitinynyrenyre Tatytybytyhy õraru-ki kia retyhynyreny. Kia reraõreny. ⁶Jesuisi Kristu-õ notyky resyna aõ aõkõ rare. Notyky resynakõ tule aõ aõkõ rare. Inatyhynamy luunamy aõ rare. ⁷Juhuhu awimy tuu tatyynmahãte, inatyhyna-ki ijera wihikỹmy teamyhỹte, moõ inatyhyna-ribi anaixãwididỹnynde. ⁸Deuxu aõkõ atarasadu juhuhu ixãwididỹnynde. ⁹Inyõ

paõ riwinykeu, ibutenode ritxiwikeki ibutumy ratarinyke. Inyõ ibinamy urihimyo arabedeerynykeki sõwemy ribinadỹnyke. ¹⁰Jiarỹ Wanyrỹ retyhynyre, kaiboho wawesemy mohõtinybenykemy adireny watxireri. ¹¹Waseriõreboho jiarỹ wadludu dire. Kia tahe riteõsinyre notyky resynamy rarybeõre ijõ wamy raryberehãre. Kia ararybekeki sõwemy wahemy kanakre. Itxeõ tỹnydỹyna rybe rityhynykre. ¹²Kowa mahãdu òte rexihukemy idi watxireri. Adeereny aõbina diwinymhỹdenyde.

¹³Kaiboho Deuxu arateõnyrenyre, urile òraruõmy boibeke kaiboho bede ywina-ribi ixinamy boibeke. Wii biwiõhenanymhỹbenyke, wiluurenkyemy. ¹⁴Bede ywina ibutumy rexibutunyre rybe-ki kia tahe rare: —Inyluuke ixiluure wese. ¹⁵Wiwana bõrenybenykeki, kaiboho widi buruakeki, bexihãrubeny ibutumy wii mahubenyheny.

¹⁶Tai jiarỹ rarybere, Deuxu Tyytybytyhy deewimy boibekemy deõbiredỹyna iwidỹõmy boibeke. ¹⁷Deõbiredỹyna dori Deuxu Tyytybytyhy òluduna-ki ramyhỹre. Wimy òludurenyre. Tai aõbo adeereny awire iwidỹõ adeereny isirare. ¹⁸Tahe, Deuxu Tyytybytyhy arateõsinyrenykeki, bede ywina ywidỹyna aõkõ bityhynyke. ¹⁹Deõbiredỹyna aõna aõnamy dỹynana-ki kia roire: aderanadino, aõbinade, raykyõmy, òta òta, ²⁰suritxoomy àladỹyna, òwõruna wii, òlududỹyna, aõbinaluu, ihãru, kyara, wobiredỹyna, wiribihitxina, ²¹ibutu aõmydỹyna ixixiburedỹỹ, axaxaluu, rỹsýnaluu byrehekỹ, tule ijõ aõna aõnã sõwemy kawesere. Inyõ kia aõna aõnawidỹỹ rierykeki, Deuxu òlõna rareasadỹỹdu aõkõ roikre. Tuu rarybere juhuule. ²²Ka heka Deuxu Tyytybytyhy aõmydỹynanamy rybena roire: iwahidỹyna kia rỹire, tii dori inywomy rỹira. Wiluuna, deysana, ywina, ruxetõena, wina, õbitidỹynana, ²³ibutu-ò awina, ixidee inytyhyna, ixirydỹyna, tai bede ywina ihoõhyre kia-ò. ²⁴Kristu hõrõ mahãdu kia itxeõ-ki ritidirenyre: deõbiredỹyna, aõmydỹynana bina-ribi, deõsana aõmydỹynana-ribi

²⁵Inyboho Deuxu Tyytybytyhy-di rokoirekeki Deuxu Tyytybytyhyry-ki rakariarenkre ²⁶Ixi deãlanararõsõ luukemy aõkõ rakatximhỹrenyke. Tai tahe ixixiburedỹyna-di aõkõ, rakatxirenkye. Wiõbiredỹyna-di rakatxirenyõke.

6 ¹Waseriõreboho. Inyõ òraruna-txi resekeki, kaiboho ywina-di biõbitinybenyke. Bexihãrumahãbenyke kia òraruna-txi ixẽõmy boibekõkemy. Kaiboho dori, Deuxu mahãdu toite wahe. ²Wiitxykywydywesemy wii biwiõhenanybenyke ibutu aõmydỹynana-ki. Iwesekeki, Kristu bede ywina tetyhynmahãtenyte. ³Inyõ ixidee aõlemy rõhõtinykeki, tahe tii aõhyy aõkõ rare, tii rexiiitxenanyhỹre. ⁴Ixinamy iny sohoji sohoji taaõmydỹyna-ò retehemyhỹke, aõhebo rotỹynymhỹremy wahe. Idi tahe ixi aõmydỹynale-di kedexityhynymhỹkre, tabireludu aõmydỹyna-di aõkõ. ⁵Iny sohoji sohoji dori taitxyky riwymhỹke.

⁶Inyõ Deuxurybe erydỹyna ijõdikewana tabedeerydỹyna mahãdu-ò ibutumy erysyna wiwihikỹle-di rirareamahãke. Tule bedeery mahãdu heka tohodỹyna mahãdu-ò aõna aõna wihikỹ riwahinymhỹre. ⁷Ixiitxenadỹỹõmy. Inyõ heka Deuxu itxenadỹỹõmy alõbõrõna-ò iny ribõrõnykeki, tiile tahe

raumynyhyymyhÿre. ⁸Inyõ òraruna ribòrònykeki, rubule taumy-ki ritake. Inyõ Deuxu Tytybytyhy deewimy tuu rotÿÿnykeki umytuedeõna ritake. ⁹Aõwihikÿ widÿÿhyymy boibeke. Kia-ki elemy ruburenyõmy. Aõwihikÿ widÿÿhy boibekeki, adeereny aõwihikÿ wahidÿÿna wese kanake. ¹⁰Ibutumy inydeereny aõwihikÿ widÿÿ-ki inyboho abededÿÿnanawikeki ibutumy iny rikiwiòhenanyrenymy, rÿkÿirenyke, ityhydÿÿdu mahãduõ bexiywinyhy ahãbenykemy iwiòhedÿÿ-ò.

¹¹Tuhe, jiarÿle ariritinykre, Paulo wahe. Betehebeny inihe ritidÿÿna nihikÿ reritinyra wadebò-di. ¹²Inyõ ayreny-ki wohyna ixidee rimykemy ratxireri, kia adeereny õtyky resynamy adi ratxirerihyymyhÿre. Kristu itxeõmy tiiboho ritÿnyrenykeu aõhõkÿmy rotÿÿnyõmykemy röhõtinyinmyhÿre. ¹³Notyky resyna mahãdu bede ywina rityhynyõre. Tiile rexityhynymyhÿre. Kaiboho irybe-ò boholakemy atxiteri. ¹⁴Jiarÿ arexiwowydynanyõhyymahãkre, Wanyrÿ Jesuisi Kristu itxeò-di areysakre, biu-ò hena òraru-ki wahe. Bede aõmydÿÿnana waki rÿimyhÿre, itxeò-ki retamadÿÿnyra waribi ixãwira. ¹⁵Notyky resynadÿÿ aõ aõkõ rare. Notyky resynadÿÿkõ tule aõ aõkõ rare. Urule biu-ò hena-di boibekele tahe aõ rare. ¹⁶Kia bede ywina bityhynybenymy boibekeki, Deuxu-ribi ywina, ruxetõena, adeereny kanakemy idi watxireri. Tule Deuxu mahãdu ibutu-ò, judeu mahãdu wese dori ratxireri.

¹⁷Karibi tako-ò tahe inyõ waixiradÿÿõmy ararekre. Beydÿÿna dori waumy-ki roimyhÿre, Jesuisi rybe rybemy rybedu òraru-ki.

¹⁸Waseriõreboho, Jesuisi Kristu ruxetõena akireny rÿikemy watxireri. Kie.